

人物志十八

湖北通志卷

列傳八目錄



王第魁

周一熊

高登先

王時來

張聯元

周家齊

王全臣

楊炳

劉誼 弟詩

韓賜麟

黃埴

黃元善

秦嘉系

尙登岸

盧前驥

熊繹祖

易履泰

查文經

曾憲德

劉廣國

彭峻齡

莫之翰

李前勳

萬時喆 從子際韶

劉延唐

胡鼎生

譚孫邁 從孫襄世

程飛雲

從子世法

胡雲步

程大夏 弟大復

志百四十

人物十八 目錄

徐尊顯

龔廷颺

曾元邁

龔健颺

從子學海

蔣祥墀

子立鏞孫元溥曾孫啟勛

邵如崙

徐卽達

陳野修

申文貴

王謹微

蘇大有

蔡成貴

樊雄楚

楊定泰

梁友穀

單懋謙

朱繩武

邱天民

周名炎 子恕先孫仁壽

易萬里

袁 奐

劉佐明

史策先

孫長紱

張孟儀

陳聯璧

常懋修

劉大任 李重

劉元弼

賈洪詔

趙晉基

汪朝相

冀庸徵

杜世忠

杜官德

聞定魁

王新祚

李逢亨

李昌平

周寅暘

胡愷

謝廷賓

賀運清

王三薦

楊佐國

子毓健

胡作梅

子克寬

江鼎金

金秉祚

宋楚望

樊安邦

談經正

金震出

薛世望

張可前

子毓碧

胡在恪

沈延標

高文鑑

洪之傑

麥良璽

張君能

李枝永

子葆元

毛鳳儀

王士溫

鄭若璜

嚴先佑

戴洪禧

額勒精額

魁玉

子札爾哈蘇
墨德哩

札克丹

文玉

元慶

額哲克

恩夔

志百四十

人物十八 目錄

二

恩澤

毛壽登

龍之繩

尚正儀

鄒養赤

鄒敬謨

羅宏漳

鄭其儲

鄭其倣

熊開楚

李宗瀚

子文楷

李文琰

張銘謙

龔榮遇

子啟正

易言翼

聶士貞

周士元

子彬

楊志道

楊自欽

龔經遠

余庚陽

胡大任

彭承堯

子朝龍
兄子先龍

謝元淮

黃士瀛

熊文瀾

王懋勳

張志紱

楊利川

張盛藻

胡樹槐

王永禩

左其選

王恩進

王言惠

何毓秀

張繼辛

傅治

王德鏹

吳秉綸

王德授

顧嘉蘅

李東宣

李元祥

彭淑

洪先燾

李定南

陳世凱

陳天培

陳紀

牟大寅

張都

黃開榜

饒應祺

李耀瑚

以上清

人物志十八

湖北通志卷一百四十

列傳八

清

王第魁字聚五鍾祥人居家以孝友稱順治初由諸生授荊州知

府撫恤凋殘治績卓著調歸德府歷山東濟甯副使廣東按察使

陝西右布政江西左布政使疏請蠲積逋安輯流亡全活甚眾一統志

志

周一熊字小渭鍾祥人順治己丑進士授旌德知縣適旱徒跣步

禱天大雨賑饑活數萬人邑多盜一熊令盜魁捕盜自贖自是遂

無盜鍾祥志

高登先字于岸鍾祥人事母至孝母歿未葬會流寇至守柩弗去

賊義而釋之順治己亥進士授浙江山陰知縣革耗羨蠲雜徭尤

志百四十

人物十八 列傳

四

加意造士巨猾為民害登先廉得之悉置於法盜聞之不敢入境

康熙十三年諸暨何克忠倡亂應耿精忠守將征之不克登先單

騎往諭其黨遂解散浙撫范承謨以能薦調知常熟請減蘇松浮

糧督治軍需于民不擾遷涿州知州涿之渾河有水怪每歲衝塌

田稼登先焚檄投水中其怪遂絕一統志 嘉慶志

王時來字遜修鍾祥人貢生由遂安丞遷平涼知縣時征噶爾丹

供應浩繁時來籌畫有方軍民便之調知陽穀歲大旱不俟詳請

開倉賑濟民賴存活擢刑部主事鍾祥志

張聯元字捷三鍾祥人康熙辛未進士歷新城曲陽知縣累擢台

州知府首草屬邑夫馬費台瀕海文風不振聯元課試獎勵自後

科第不絕鍾祥志

周家齊字二南鍾祥人父昌官登萊道家齊由選貢授定海知縣

縣故舟山地新置家齊喚咻勞來城郭市署之役數月竣工民不知疲憫其地斥鹵苦旱勞導民開渠後賴其利在任有反風滅火之異以母憂歸起補烏程踰年卒

鍾祥志

王全臣字仲山鍾祥人康熙甲戌進士授汲縣知縣遷河州知州均糧豁賦民困以蘇再遷甯夏同知開大清渠灌田無算較唐時兩渠爲利更溥擢平涼知府會大軍討澤旺奉調隨軍支放糧餉在軍進潼商道副使時師行日久轉輸不繼兵且譁全臣貸於商賈以百貨資軍償以直軍心始定閱兩月餉至當事者諱言遲誤竟以全臣所貸爲一人虧空逮刑部全臣對簿自實上特宥之令隨副都統范時繹往瓜州屯田全臣墾闢草萊遠引疏勒河水大興屯種歲得軍食數萬旣而土魯番回民舉國來歸議卽安插瓜州授全臣安西兵備道築城堡開溝渠公私廨舍服食器用無不

志百四十

人物十八 列傳

五

畢具計口分地回民胥安生業以疾解任卒於蘭州

嘉慶志
鍾祥志

楊炳字蔚友鍾祥人力學工文雍正癸卯會試第一一甲三名進士授編修累遷侍讀學士典試江西分校北闈督學福建所取士如鄂容安介福英廉曹秀先陳兆崙趙青藜皆一時碩彥得人稱

盛鍾祥志

劉誼字宜菴鍾祥人父鵬起諸生精方書人爲之語曰欲得活劉公藥誼嘉慶庚申進士授戶部主事遷員外郎轉江南道御史累擢通政司參議太常寺少卿宗人府府丞卒官自諫垣至列卿前後章疏數十上皆朝廷大計畫如重邊防修屯政廣積貯弭水患清盜賊謹苗疆肅嵯綱慎樞密諸疏皆中機要彈劾貴勢直聲甚著弟詩字古愚登道光壬午進士以知縣發甘肅歷署皋蘭平羅狄道諸州縣所至稱治調署巴燕戎格廳通判補兩當縣調署山

丹時兵討回逆過山丹境芻糧辦具軍行如流再署平羅又署鹽
茶廳同知及靜甯知州在平羅躬督役修數渠立大雨中三日不
退渠成民賴其利調補甯夏擢洮州廳同知捐修州城尋署平涼
知府以疾告歸

鍾祥志張裕鈞撰墓表

韓賜麟字笛樓鍾祥人道光己酉拔貢以知縣發甘肅補徽縣剔
弊除奸數月稱治積寇毛大安等聚黨劫掠悉以計擒斬之增置
書院義田禁民間露葬修城隍通水利調知燉煌邑自雍正間遷
內地民出關屯墾其後生齒日繁物力不給常貸官糧爲籽種歲
歉至賣田宅鬻妻子以償賜麟請以十年分徵民困始甦調署皋
蘭旋署甯州代民輸地丁銀六千兩有奇遷循化廳同知撫定民
番墾荒田八百餘畝修八工水利築三渠立保甲民大安悅以疾

歸

鍾祥志

志百四十

人物十八列傳

六

黃垣初名本敦字念堂鍾祥人道光壬午進士授封邱知縣值河
決塌度地勢開大濠二以殺水患封邱人至今賴之城申質肆鹽
棧舊有季規悉屏弗受與民和買不用官價

鍾祥志

黃元善字讓卿鍾祥人咸豐己未進士授戶部主事歷員外郎郎
中光緒初轉補河南道御史再遷工科掌印給事中居諫垣章疏
數十上其論東三省曰俄羅斯窺伺東邊久矣倭人新起欲取高
麗以圖遼東二虎鬪於中原東三省人民之肉其足供乎後言皆
驗九年授貴州糧儲道黔地瘠苦歲資鄰省協餉或謂苗田無賦
可將虛懸課額按畝攤派或謂永從等田熟田宜丈量升科元善
獨力言不可剔中飽嚴侵蝕行之期年庫款漸裕歷署按察布政
二使二十九年以病告歸宣統元年卒年八十九

采訪冊

秦嘉系字公緒京山人順治初貢生赴京考選零陵陳純德以御

史殉甲申之難淹柩館側嘉系積脩脯三十餘金買地永定門外
葬之立石表其墓其好義如此九年授海甯知縣發奸摘伏綱紀
肅然里中不逞之徒窩通洋盜嘉系窮治根株民害始息浚市河
修學校葺邑乘建義冢吏治稱最

朱彝尊日下舊聞 浙江通志

尙登岸字未山京山人康熙庚戌進士投宿遷知縣宿不產米運
必徵米民病之登岸力請易徵麥粟至今稱便建城北攔馬減水
壩並開支河十道以消水患後遷宿虹同知

京山志

盧前驥字希乘京山人康熙癸丑進士授甯海知縣治尙廉平建
義學賑災黎豁丁恤竈平賦甦民又修方正學祠卹其後裔以卓
異陞蘭州知州母老乞養歸

京山志

熊繹祖字定思京山人雍正乙卯選貢乾隆初以州判發直隸治
河捕蝗有法陞三河知縣遷薊州知州時上駐蹕盤山召對稱旨

志百四十

人物十八 列傳

七

十五年擢天津知府歷登萊青道南韶連道韶有民墾山地四千
餘畝繹祖詳請奏免升科民大悅調肇羅道驛鹽道二十八年陞
貴州按察使署布政使因廣東糧案被議歸四十九年查天下五
世同堂者聞奏繹祖適得玄孫蒙恩賞有差年九十二卒

京山志

易履泰字旋吉京山人乾隆庚辰舉人由漢陽府教授陞廣甯知
縣興利除弊善政頗多尤加意學校獎拔單寒士習因而丕變著

有果能堂集

京山志

查文經字耕六京山人道光丙戌進士授戶部主事遷員外郎以
知府發江蘇補常州府適英人入寇文經捐資爲守備甚具勸民
勿驚徙事後民頗思之二十三年調江甯知府陞徐州道調淮揚
道因糧船回空遲滯被議三十年起授福建按察使禁溺女及以
婦女殉葬者咸豐二年調江蘇按察使堵禦豐縣河工有方尋署

漕運總督接管楊殿邦所帶兵勇駐揚州南路旋丁母憂假滿旨
令督辦江南糧臺同治初克復金陵報銷事竣告歸

京山志

曾憲德字峻軒京山人道光己酉拔貢授工部小京官咸豐四年
粵賊再陷省城土匪肆擾憲德丁憂在籍倡辦團練防守敘功授
邵武府同知幫辦建甯軍務克復建陽縣城歷署泉州興化知府
平莆田大崙鄉土匪潘楷十一年粵賊大股陷汀州及連城縣憲
德駐兵永安相機進剿克姑田并汀連郡縣保陞道員同治元年
溫州會匪滋事陷福鼎以兵往平之復其城署延建邵道先後勦
擒九龍山匪首李阿四沙縣匪首王楓浦城匪首吳選漢等地方
肅清投興泉永道興學造士育嬰恤孤庶政皆舉八年請假開缺
九年丁母憂歸

京山志

劉廣國字寶生潛江人順治己丑進士授高平知縣革除加耗正

志百四十

人物十八 列傳

八

供外不費民一錢調知岑溪時土司不靖民曠耕作多餓殍廣國
糴米散賑給牛種墾荒田代償逋賦數百金累官陝西僉事裁缺

歸

潛江志

彭峻齡字又房潛江人順治己亥進士授龍川知縣請復行潮鹽
商民獲濟建學課士文教漸興閩藩叛大兵出征道龍川供億甚
繁峻齡徵集有方民無擾累時城守兵盡調發適他寇入境乃募
壯士二百人設伏邀擊之擒斬殆盡民感其德

潛江志

莫之翰潛江人康熙庚戌進士授上高知縣時浮糧既汰里甲未
併役重差繁民以為累之翰力請得併里革費民德之

江西通志

李前勳字恆堂潛江人康熙己丑進士授博羅知縣裁陋規銀數
千兩禁納糧米斛面費清釐鹽政暇則教課士子以有本之學朱
文端軾湯文正斌皆薦之調清河知縣以母老乞歸母卒哀毀而

逝潛江志

萬時喆字榭香潛江人道光乙酉鄉試第一以知縣發廣東初任連平州能結積案以勤廉稱調德慶州州治依山素有虎患時喆泣任虎夜渡河而去授龍川縣治績益懋康熙間彭峻齡嘗宰是邑有惠政縣人建祠繪像祀之因並繪時喆像於旁從子際韶一名夔字葵甫由舉人考取官學教習歷署榆林中部扶風知縣補涇化縣所至除雜徭平爭訟囹圄為空其在中部也回匪新退城邑為墟際韶繕修城垣出倉中剩粟以工代賑招復流亡日出督工晨聽訟午治團練晡查戶口夜巡城數月不懈四境就安潛江志劉延唐字廷綬景陵人崇禎庚辰進士順治初總督佟養和聞其賢委署荆西道副使招撫流寇小秦王等三萬餘人綏輯安陸荆州襄陽三府流民父喪去任延唐撫孤姪成立修本縣學宮設義

志百四十

人物十八 列傳

九

田建橋梁掩骼鄉人稱之一統志

胡鼎生字還竹景陵人順治己亥進士康熙十三年授進賢知縣大旱數月苗盡槁鼎生朝夕步禱不雨乃身暴烈日中又不雨乃身荷校朱署曰失職令某是日大雨四境霑洽歲畢登縣瀕鄱陽湖盜賊出沒鼎生偕鎮將防守購賞嚴緝自是不敢犯境江西通志譚孫邁字端嗣景陵人歲貢授靖州訓導刮磨士習敦尚實學俸

入半資貧士靖逼苗疆奸民時亡命入苗煽擾邊鄙孫邁請於知州單騎往諭定之得其欵狀以歸州欲請於大吏上聞孫邁力辭從孫襄世字字初雍正丙午舉人以薦授內閣中書擢刑部主事用法平允尚書勵廷儀甚倚重之出為柳州知府其高祖元方舊治也平反疑獄民皆悅服內召復為刑部員外郎卒官惟布衾一具詩稿數卷而已湖北通志檢存稿

程飛雲字培風景陵人順治己亥進士初授推官缺裁改獲鹿知縣歲視賑貸有方值滇閩連叛禁旅出討飛雲犒勞境上咄嗟立辦市肆不擾而芻糗無缺俗強悍輕爲剽劫飛雲擒治無遺閩閩獲安擢行人告歸時沿明季弊政奸胥分納戶邑日收戶歲易之曰排年徵一輸十追呼如沸飛雲爲書萬言徧謁楚中大吏乃奏除之立石永禁後起爲工部主事不赴從弟世法字元楷康熙己酉舉人有學行官歸州學正

湖北通志
檢存稿

胡雲步字青遠景陵人順治甲午舉人授廣平知縣下車問民疾苦一漳水淤涸田賦歛收一攬戶包差中飽瘠民一運解花麻費直繁重雲步力請改收折色就京採買革攬戶均田減賦民大感

悅天門志

程大夏字禹奏飛雲子康熙己未進士授黎城知縣考最擢戶部

志百四十

人物十八 列傳

十

主事丁父憂起補原官條上運米事例剔除僞冒主鹽法盡革陋規遷禮部郎中監督倉場疾卒弟大復字環修由

投崑山知

縣瀕海要地賦繁政劇民習機利大復不動聲色懲奸剔弊期月大治會母憂當去巡撫于成龍奏其治狀聖祖命墨衰治事是時州縣奸民多與海賊遙通聲氣爲患鄉邑緹弁往來偵緝蹤跡民情不安大復密爲部署約束善良轉相防攝賊魁就殄餘黨所在竄匿牽連甚眾獨崑山四境民無罹其患者大吏如宋犖張伯行等皆以循良第一論薦無何坐他累去官當時惜之

湖北通志
檢存稿

徐尊顯字勛庵景陵人康熙中以貢生授永明教諭重建學宮捐置學田購經籍修濂溪書院令諸生肄業其中資以膏火遷浙江太平知縣奉檄讞訊海洋三百餘案多所平反全活近萬人

湖南通志

門志

龔廷颺字庶咸景陵人康熙癸未進士授侯官知縣有能聲決獄生十七人編審豁無田貧戶三千二百七十二丁大水勘災請免冲塌田萬三百餘畝租賦興學教士成名者四十餘人擢知蒲州萬泉民怨其令聚眾毀署廷颺從兩隸往諭平之罪爲首者餘不問大將軍年羹堯有廐馬牧人不戒逸噉民田禾黍廷颺收其馬告主者責償其直其不畏強禦如此

天門志

曾元邁字嚴齋景陵人康熙戊戌進士由翰林改監察御史有直聲疏請定外官秩滿考察法大略謂三年一考分別黜陟至九載三考無善政可陟雖無劣跡亦當黜退以爲貪祿苟榮者戒有薦元邁於大學士朱軾者元邁卒不肯往見其耿介如此

湖北通志檢存稿

龔健颺字惕齋景陵人雍正甲辰進士授工部主事擢監察御史疏奏砌馳道核門禁平市糶巡視南城有勢家殺婢請自治不送

志百四十

人物十八 列傳

十一

刑部屬託百方卒執法不移尋以指陳漕弊爲重人所齟降調行人司遷兵部主事卒子學海字醇齋乾隆丁巳進士授內閣中書歷官侍讀學士出爲兗沂曹道病歸復補岳常澧道以事降同知發貴州時逆苗香要等聚眾攻丹江丹江城卑薄恃江水爲固學海先期盡收江船苗不得渡會大雨暴漲苗乃退散設計進勦擒之總督吳達善上其狀擢貴東道

方苞撰墓誌 嘉慶志 案雍正四年改景陵縣爲天門方苞

以健陽爲天門人從後書之也又按李元度撰學海傳云任岳常澧道公清率屬微服訪民間疾苦興利除弊宵小斂跡也

蔣祥暉字丹林天門人乾隆庚戌進士授編修嘉慶三年副主浙江鄉試十年充會試同考升國子監司業累遷至祭酒改少詹事歷奉天順天府丞通政司副使再轉光祿寺卿宗人府丞擢左副都御史以事降光祿寺卿復授左副都御史再以事降鴻臚寺卿年老休致主講金臺書院者數年卒年七十八子立鏞字笙陔嘉

慶辛未一甲一名進士授修撰歷主河南廣西鄉試四遷侍講學士轉侍讀學士進少詹事擢內閣學士兼禮部侍郎孫元溥字譽侯道光癸巳一甲三名進士授編修洊升侍讀出爲九江知府未至署江西鹽法道及抵郡守任時粵寇已熾烽火逼境上元溥籌備戰守不遺餘力以勞致疾卒官自祥墀至元溥三世並入詞垣兩登鼎甲文名盛於當代云元溥子啓勛字鶴莊咸豐庚申進士授吏部主事旋補稽勳郎中遷河南道御史出爲鎮江知府調蘄州府擢衡永郴桂道啓勛弟子傅燮字和卿光緒丙戌進士官雅安知縣

天門志
采訪冊

邵如崙字角三天門人乾隆丁巳進士授臨淄知縣值歲歉捐俸賑饑勸措紳散貸全活甚眾治所舊有溫泉久涸時童謠云溫泉開清官來如崙至之明年泉忽湧出人以為應

天門志

志百四十

人物十八 列傳

七

徐卽達字雲谷襄陽人有經世大略順治二年遊陝西英親王見而奇之奏試署河西勞來安集流亡得所後移潼商道尋辭歸

襄陽志

府志

陳野修襄陽人歲貢康熙元年任高縣知縣時獻賊初平兵火之餘與民休息清糧賦墾荒田釐剔弊端政化一新任九年民歌頌

不衰

四川通志

申文貴字任人本襄陽人隸漢軍駐防廣州康熙四十一年以征獠排功授驍騎校尉歷遷副將攝理刑名事有李某寵其奴四兒其幼子洩其陰事奴銜忿殺之李執控其仇家文貴廉得其私詣李見四兒曰賊在是矣一訊而服廣西饑文貴督賑忽廠中火起董事者皆避文貴獨不去火漸逼足仍不移救者益力由是米斛悉得無損乾隆四年卒廣州人思其德祠於城南

廣東通志

王謹微字堯錫襄陽人康熙癸未進士授銅仁知縣平反冤獄大吏疑其立異訶得其實乃大重之以老告歸

襄陽府志

蘇大有字元亨襄陽人行伍累官定廣副將雍正六年丹江生苗梗化大有率守備傅又新由右路攻克也告復由烏高攻克楛桶追至石板寨山後苗千餘來犯大有設伏佯敗麾眾夾擊直取小丹江克土城五寨苗又劫參將趙文英於天柱大有馳援擊走之追至黃毛嶺苗擁眾四千阻隘大有冒險衝殺左股受傷戰益力連克八寨乘勝進攻丹江平擢雲南鶴麗總兵巡撫張廣泗以貴州清水江地接九股生苗及古州降苗聚處數萬撫馭不易請以大有留辦清江軍務八年卒賜祭葬予祀賢良祠

嘉慶志

蔡成貴襄陽人行伍累官安籠總兵雍正六年勦八達寨逆獾顏光色等加都督僉事七年調右江總兵九年勦鄧橫寨苗調左江

志百四十

人物十八 列傳

三

加都督同知尋擢雲南提督以雲南用兵久月廩故兵家之貧者墾大理城外三十里草廠以贍其費請免升科孤寡咸霑其惠以老致仕寄居雲南

嘉慶志

樊雄楚字雲坪襄陽人嗜學工詩善騎射乾隆戊戌一甲二名武進士由侍衛授山東游擊遷袁臨副將嘉慶初論平教匪功擢高廉總兵屢破洋盜誘斬其酋烏石二洋面悉平調福建以疾歸十八年兩江總督百齡復薦起之署狼山總兵調徐州平定海州鹽梟雄楚身經二百餘戰創痕纍纍口不言功軍行信賞必罰士卒樂爲之用年老乞休以原官致仕仍食半俸卒年七十六著有半畝山房詩存後同邑有楊定泰者嘉慶辛未一甲三名武進士官福建游擊遷同安參將亦能詩人以比之雄楚云

襄陽府志

梁友毅字若赤襄陽人乾隆乙卯舉人揀發江西任崇義知縣有

惠政改廣西歷靈川宣化二縣內地民與安南人爭金銀厥聚眾械鬪友穀往諭平之以母憂歸嘉慶初教匪擾襄陽友穀傾家資練集鄉勇建蘆棚以庇難民請於官以賑之又築歐家寨土堡堡成周四十里載輜重人居者不下數十萬戶防禦嚴密與襄陽城爲犄角賊不能犯將軍明亮欲薦之固辭不出官其子印文爲新

昌縣丞

襄陽府志

單懋謙字地山襄陽人道光壬辰進士授編修十五年典江南鄉試十七年命直南書房擢右贊善再遷洗馬二十年督學廣東在任陞左庶子乞養歸二十八年襄陽水災捐穀倡賑作糜賦饑者全活甚眾咸豐初粵匪陷武昌竄踞金陵豫捻復起蔓延唐鄧間命懋謙辦理本籍團練練兵籌餉與官吏併力爲固守計卒以荆襄爲根本克復省城及下游各州縣兩湖肅清懋謙與曾文正國

志百四十

人物十八 列傳

南

藩並受特褒以京堂升用六年服闋入都仍直南書房授左副都御史八年督學江西十一年擢工部左侍郎同治元年署戶部調吏部旋陞左都御史充癸亥會試副總裁三年署禮部尚書擢工部尚書充丁卯順天鄉試副考官七年調吏部尚書十一年命協辦大學士充翰林院掌院學士尋授文淵閣大學士十三年告歸卒年七十有七諡文恪

襄陽府志
采訪冊

朱繩武字伯祺襄陽人同治壬戌舉人以教習知縣發福建署長汀調武平武平俗獷嗜殺巨案纍纍繩武至練團保緝奸盜不遺餘力有鍾姓聚族孔道側每劫江廣行旅先後捕得四人悉寘之法又劉士源居深山中招聚亡命一夕往掩襲之獲士源餘黨奔散在任九月破獲積案數十起箬竺昭信潮嶺中赤等鄉素頑梗皆帖然莫敢爲非

采訪冊

邱天民字次衡宜城人明侍郎瑜之玄孫雍正中拔貢歷署山東霑化鄒平知縣調陽信擒老瓜賊首楊甲盡捕其黨與計謀殺五十餘獄得所埋屍二十六具寘之法先是沂水有曹黑等三人謀死馮石二人獄久定天民鞠瓜賊時供殺沂水二人狀甚悉乃知殺人者非黑而黑已斬眾護前令不欲上聞天民曰一誤豈可再誤耶力白之出二人於獄前主是獄者皆獲咎調滕縣忤知府意去官著有慎刑錄

沈起元撰誌

周名炎字燮甫宜城人乾隆庚辰舉人由江陵訓導遷楚雄知縣築龍川江隄興學課農政聲大著調騰越知州撫定夷人之讎殺土司者歷升曲靖知府子恕先字心如貢生授潁州府同知以憂去起署徽州寧國府同知壽繁昌望江歙等州縣再攝安慶知府恕先善決疑獄邪匪王景曾亡命有河南同姓名者爲直隸所拘

志百四十

人物十八 列傳

五

發交安徽審辦恕先辨其誣同官忱之曰欽犯也故出可耶卒執不移已而他處獲真王景曾事乃白眾始服孫仁壽字鏡瞻道光乙巳進士初署星子知縣鄱陽湖溢民多漂沒平糶以賑之改官河南署杞縣調息二邑故捻匪出入乃招流亡練鄉勇修堡寨積糗糧民皆有固志旋補河內治如在二邑時捻賊不復犯擢陝州直隸州署南陽知府告歸

襄陽府志

易萬里字鵬九宜城人九歲通經及長解天文常言歲在龍蛇秦楚必亂嘉慶初元白蓮賊果起萬里從將軍恆瑞勦賊入蜀上五路合圍議賊敗入陝西復從恆瑞追擊至白水江以功授寧羌知州奉調廣東署佛山同知領紅單船捕海盜百餘人尋補廣甯知

縣卒官

宜城志

袁奐字蔚美棗陽人崇禎壬午副貢官攸縣教諭流賊入湖南棄

官居武昌福王立上長江戰守議時不能用順治二年舉遺佚授

江夏知縣甚有名稱告歸棗陽志

劉佐明字公亮棗陽人順治戊子拔貢授懷仁知縣邑經流寇城

郭邱墟佐明招來流亡剔吏蠹均夫役民賴以安調知石門亦有

惠政襄陽府志

史策先字吟舟棗陽人道光癸巳進士授吏部主事歷員外郎中

江南道御史轉京畿道以知府發直隸署正定補廣平任御史時

劾湖廣總督徐廣縉督師遷延罪又請停止捐納軍需舉人生員

守廣平時愛民育士悉以陋規資書院膏火告歸著有兵法集鑑

射藝詳說思有濟齋文集寄雲館詩鈔夢餘偶鈔襄陽府志采訪冊

孫長紱字赤城棗陽人咸豐丙辰進士歷官江西布政使再護巡

撫時粵匪分擾江西所在糜爛長紱察吏治整軍旅不勞而理總

志百四十

人物十八 列傳

六

督曾國藩巡撫沈葆楨交薦之江西肅清加頭品頂戴太子少保

內召入都值粥廠開期派充監放大臣感寒疾卒未及中壽時論

惜之襄陽府志

張孟儀字瞻澤南漳人行伍康熙中歷膠州副總兵地瀕海輯兵

衛民地方賴之襄陽府志

陳聯璧字珏庵光化人明廕生順治初由戶部員外郎授歸德知

府時百姓流亡城邑荒圯聯璧勤撫輯廢墜具舉調台州知府歷

官汝南兵備道光化志按聯璧尚書大道子

常懋修字慎亭光化人乾隆乙卯武進士授侍衛邪匪起懋修在

籍率鄉勇助勦獲匪首李茂歷官松桃協副將在任二十年苗民

帖服有打牙苗者女將嫁必去其上下牙云恐娶者受其毒也懋

修教以艾置蒜炙其頤甘草菜豆煎飲之曰此免矣其風遂息襄陽

志府

劉大任光化人乾隆戊申武舉善舞大刀因以大刀名嘉慶初教
匪擾光化大任率鄉兵勦之殲齊王氏於屹兒嶺擢千總同邑李
重應募為鄉兵從大任殲賊於本柴河張吳岡三尖山等處有功
不肯受官職為人坦直年一百十二歲卒

襄陽府志

劉元弼字伯良穀城人光緒庚寅進士授吏部主事歷員外郎中
擢成綿兵備道署四川按察使吏事通敏不激不隨調雲南迤西
道怒夷戕法國游歷人於途元弼至始獲其犯案得結親歷蠻愛
猛隴遮芒過耕諸寨詢問土俗及所疾苦以勞卒官

采訪冊

賈洪詔字金門均州人道光庚子進士以知縣發雲南歷任定遠
他郎河西南安元江昆明等州縣嚴明有聲判他郎捕積賊方國
榮置之法元江廠匪李子青安光弼等結黨殺掠洪詔先後擒誅

志百四十

人物十八 列傳

十七

之大吏如林文忠則徐李文恭星沅吳文節文鎔皆以為才累疏
保薦擢景東同知署順寧知府旋補順寧署曲靖兼迤東道時迤
西回匪倡亂郡縣不守迤東回亦蠢動洪詔瀝陳其狀請兵勦辦
有密以其稿上聞者文宗心識之六年以平南霑回寨功加道銜
八年擢迤南道以平陸涼州紅土牆回寨功加按察使銜九年授
雲南按察使留辦東路軍務十年遷布政使尋丁父憂同治二年
服闋擢雲南巡撫洪詔方駐川募兵滇督勞崇光有不用外兵以
回攻回之奏洪詔力陳不可朝廷以二人意見參差而洪詔疏措
詞戇激奪職歸主講鄖山書院凡邑中修學宮置倉穀籌寶興膏
火築東門外隄皆預其勞咸底於成光緒二十二年重赴鹿鳴賞
三品卿銜次年重宴恩榮加頭品頂戴年九十三卒

采訪冊

趙晉基字子培鄖縣人乾隆辛酉拔貢官莒州知州見城圯濠平

不足以資捍衛鳩工浚築壕成而苦無水偶於南濠掘得一器如甌徑圍尺餘四旁有孔附著堅不可動因剔取泥淤水忽從中涌出不日濠滿民驚以爲神助以母憂歸起補文昌知縣亦有政聲

嘉慶志

汪朝相字調元房縣人乾隆辛巳進士任遂甯知縣值金川用兵辦理糧運往來旄牛乍了革什咱布魯密章谷梭落柏古間與役夫同甘苦時出已資犒之終事無竄逸者嘗夜入大崖窩風雪埋山迷不得路誤墜坎窞中僵臥不能起或露宿大樹下猿虎踞號僕從皆戰栗朝相獨危坐達旦抵海子或言水有怪不可行朝相曰吾勤王事豈計是哉竟夜渡之居官八載雖軍役繁興而民不知擾遂寧人德之父憂以毀卒

嘉慶志
四川通志

冀庸徵字石卿房縣人嘉慶癸酉拔貢除遵化州判佐理有能名

志百四十

人物十八 列傳

六

歷署豐潤玉田知縣補大城知縣丁憂起知永福光澤尤溪等縣終永定所至稱理尤好作育人材俸入皆資給寒士服官三十年而家反爲之貧永定人立祠以祀

鄭陽府志

杜世忠竹山人行伍從征台拱有功授守備乾隆十二年從總師張廣泗征金川攻色底雙碉世忠突出執其酋酋亦猛力久相持世忠陽敗側出矛刺之洞其脇死戰時中火器毒臥瘡月餘乃起

竹山志

杜官德字輔長竹山人乾隆乙丑進士授吏部主事歷郎中出爲江安糧道擢浙江布政使坐事落職後以同知銜辦理陝西軍需攝安西道篆出嘉峪關千餘里悉心糧屯蕃夷安輯會因公赴蘭

州卒

嘉慶志

聞定魁字星齋竹山人由協標兵從征湖南廣東廣西擢守備咸

豐末統防兵駐樊城數敗捻眾遷游擊薦升參將性沈勇善謀治兵嚴在襄數十年保衛功多同治戊辰歲大饑與當事分地賑濟全活無算光緒初護理提督尋卒

襄陽府志

王新祚字爾開竹谿人順治初恩貢倜儻有才略康熙四年陝西兵征李來亨道由二竹時竹山乏令上司廉其能令攝邑篆支措糧餉民不知累邑人德之

竹谿志

李逢亨字培元竹谿人乾隆丁酉拔貢由薊州州判歷官三角淀通判南岸同知河間知府永定河道署東河總督身任河務四十年不辭勞瘁慎重隄防籌措周密欸無虛糜工無曠役其在河間也平反冤獄案牘一清年七十八卒

鄭陽府志

李昌平字小魯竹谿人嘉慶辛酉進士授內閣中書充軍機章京時教匪蔓延昌平上平賊四策一募勇士二飭戰具三結民寨四

志百四十

人物十八 列傳

九

廣糧糈皆施行累官宗人府主事戶部郎中

鄭陽府志

周寅暘鄖西人康熙壬戌進士除臨潼知縣歲祲盜起渠率王金山嘯聚驪山又渭北布袋賊出入櫟陽勢熾甚寅暘先後皆以計擒之寘於法邑民安堵蝗起寅暘虔禱即飛退諸生逃荒遠出學使以避考除名寅暘力請悉原之以事降闕縣典史官聞十餘載兩攝縣篆某官挾勢武斷為鄉曲患寅暘白於大吏竟黜之其不畏強禦如此丁父憂歸

湖北通志檢存稿

胡愷字悌庵鄖西人監生由陝縣縣丞擢甘泉知縣善鈎距有割其鄰之牛之舌者牛主鳴之官愷曰爾鄰為誰曰某曰有怨乎曰有之愷曰第歸殺爾牛可也因榜示禁止屠牛既而有告牛主殺牛者愷曰割其鄰之牛之舌者汝也拘之別遣搜其家牛舌故在乃重笞之而罰牛之直以償其主人以為明

采訪冊

謝廷賓保康人諸生有智略郝永忠盤踞房竹間時出劫掠廷賓糾合鄉里保衛山砦間出奇兵擊賊輒捷以故賊不敢縱一邑賴之一統志

賀運清字疏林荆門人順治丁亥進士授興化知縣歲大歉運清躬親放賑冬春設粥漸暖則計口授米全活十餘萬人擢戶部主事轉吏部郎中詔求直言運清陳奏稱旨授興泉永兵備道山寇竊發運清勦撫兼施踰月而平閩俗惑於風水不葬其親運清嚴禁諭之未幾致仕歸荆門志

王三薦字克生荆門人順治戊戌進士兩任漳州府推官兼明元允獄年冤滯嘗行縣有羊角風起於輿前入一池中旋轉不休已而浮豬毛一撮三薦驚曰必下有伏屍令人浚之果然乃稽戶冊有朱宗者呼使前曰爾何殺人棄此其人色變一訊服罪蓋逆旅

志百四十

人物十八 列傳

三

主人謀財者其神察多類此荆門志

楊佐國字荆湖荆門人順治辛丑進士授咸寧知縣遷商州知州吳三桂反逆黨圍城投以偽劄佐國登城罵之焚其劄率士民死守堵禦七晝夜援兵至賊始解奸民張名貴通賊脅從甚眾佐國置名貴於法餘皆釋去民感之擢刑部員外郎有貴家殺人同官多瞻徇佐國獨持法不撓尙書魏象樞稱之轉禮部郎中典試廣西尋授廣東驛鹽道調署南韶連道招撫花山賊改置花縣兩攝臬篆平反甚眾遷鴻臚寺少卿轉太僕寺卒官子毓健貢生授平涼府通判調延平署尤溪知縣邑故有朱文公祠南溪書院咸重修之捐俸置祀田歷臺灣同知擢順德知府調南昌再移鳳陽廬州告歸嘉慶志 陝西通志 荆門州志

胡作梅字修予荆門人康熙壬戌進士授檢討累官國子祭酒士

服其教遷詹事有盜通倉米者連及無辜刑部尙書張廷樞爭之
上疑張壞法怒下獄九卿議多阿旨作梅力訟廷樞直得解九門
提督某陷人死罪作梅曰其事上卒罪某擢禮部右侍郎大軍征
澤旺命赴軍前督饟禁剋減懲侵蝕米石溢出土馬飽騰五十七
年八月卒於道年六十五賜祭葬子克寬字東易康熙戊子舉人
由中書出爲松江知府勤於治獄有挾忿誣張姓民爲通洋大盜
者克寬廉其枉請釋人上遣尙書張鵬翮覆訊卒從其議舊修海
塘動費巨萬克寬以尾欠三千餘金築之費省而工固後任大理
知府歲祲發屯米貸民或言宜先請克寬曰大理距省會千里往
反彌月饑民能待乎遂發之以母憂歸

嘉慶志

江鼎金字紫九荆門人康熙乙丑進士任高要博羅二縣招撫流
亡出粟賑貸編審戶口力卻除丁之賄徭役以均擢刑部主事平

志百四十

人物十八 列傳

三

反大獄全宛平民王懋修等百餘人擢口北道歲饑籌給籽種賑
卹孤貧地震以壓死者給構掩埋建義學於鷄鳴驛置田三百畝
以資膏火以老致仕士民肖像祀之

嘉慶志

金秉祚字琢齋當陽人雍正中拔貢授興化知縣值淮揚大饑賑
冊分極貧次貧秉祚獨籍極貧八萬餘戶大府靳之檄令查汰秉
祚取印置案頭曰願罷歸不忍見餓殍塞路也卒如所請歷遷徐
州知府徐州累歲災潦較淮陽爲甚秉祚濬蕭縣橋廟朔里等河
開碭山義興永定諸渠通銅山塞河一百二十里濬范家窪蔡家
莊引河八道百姓稱便後調潁州知府卒

嘉慶志
當陽志

宋楚望字荆川當陽人雍正癸丑進士授句容知縣勸農育士調
任丹徒歲饑散賑徧歷窮鄉民霑實惠擢海州直隸知州調太倉
直隸州築海塘六十餘里檄查揚州水道時河道堙塞久疏治無

功楚望請疏舊海口使下流宣暢諸水自達於海議上果用其策
累遷常州知府淮徐兵備道致仕當陽志

樊安邦當陽人武生嘉慶五年白蓮賊陷縣城安邦招練鄉勇隨
官兵復之以功授千總二年奉檄令當陽東湖宜都鄉勇守宋家

隄賊不敢犯後升守備荆門志

談經正字復齋遠安人康熙庚午舉人任政和知縣政平訟理尤
善於緝捕指縱必獲後調彰化數年以母老乞養歸荆門志

金震出字鳴遠江陵人父秉乾明詹事順治三年大兵下贛州以

震出爲嶺北道時贛遺民十無二三士卒猶搜拷財物不已震出
言於諸將力爲禁止釋各營所略被難婦女掩骼之未葬者虔

人德之康熙湖廣通志

薛世望江陵人順治八年任廣東鎮平知縣時邑甫平定外寇尙

志百四十

人物十八 列傳

三

繁世望多方招徠民賴安堵復請蠲七年錢糧歸防兵於經制從
之廣東通志

張可前字箸漢江陵人順治壬辰進士授瑞州府推官矜慎庶獄

多所全活擢吏部主事尋遷郎中歷左通政太僕太常二寺卿副
都御史疏請於蘭州設將軍控制河西邊境以安擢刑部侍郎轉

兵部致仕卒先是荆州安陸二府協修江漢兩隄屢築屢潰可前
力主兩地自衛之說以杜推卸隄工始固民利賴之子毓碧字鳳

集官雲南知府值吳三桂初平招流亡給牛種使復故業歸者日

眾擢井陘道荆州府志

胡在恪字念蒿江陵人順治乙未進士授刑部主事歷郎中督學
江南得人最盛如王掞王頊齡趙申喬韓爌皆一時選後至公輔

遷江西驛鹽道署按察使有大獄二十餘人論辟在恪閱其辭疑

不實再四推鞠誅及數人而止以母老乞歸囊無官物母卒後與

季弟友愛甚至居同室食同席遇有嘉旨弟不至未嘗下箸年八

十二卒

荆州府志參趙申喬撰墓志 又按申喬誌云本姓楊世居荆門州楊樹巷曾祖文贇江陵胡氏早卒遺孤一人依

舅氏以生遂從其姓

沈延標字令望江陵人順治戊戌進士授莆田知縣為政明敏果

於任事嘗修木蘭陂瀨溪橋甯海隄築流明沛尾二堰邑人賴之

荆州府志

高文鑑江陵人順治戊戌進士知清豐縣裁免雜派歲省數千金

訟繫者立為剖決民生祠之

畿輔通志

洪之傑字念庵江陵人順治己亥進士授瓊州府推官丁憂起補

井陘知縣有善政擢御史歷左右通政順天府丞僉都御史巡撫

江南之傑往剛果有幹局在臺中數言事皆合機要用能致位通

志百四十

人物十八 列傳

三

顯云荆州府志

麥良璽字殿安祖籍遼東至良璽與其仲兄居江陵遂為江陵人

以軍功授把總吳三桂反從大兵攻岳州督舟師戰洞庭大破之

攻鬼門關先登拔之進平雲南擢遊擊黎平土賊反往討之賊驚

曰是躍身上鬼門關者何可犯也相率請降遷參將歷副將授肅

州總兵在任八年軍民安堵歲饑貸粟河西倉儲四千石約他日

民償不及數當代償及秋大熟借者爭輸竟無升合負年老告歸

江陵志

張君能字子常江陵人少從軍官至澧州千總康熙十八年從征

吳三桂以功晉都督僉事遷甯夏游擊三十一年與平祝郎三十

五年征噶爾丹戰兩狼山破之遷均房參將擢黎平副將卒荆州府志

李枝永字亞山江陵人康熙庚午副貢授應山教諭歲饑奉檄監

賑貧戶均霑任十七年告歸滕甫上適升安陸教授或請追還杖
永不司曰是自欺也遂歸子葆元乾隆丙辰舉人官常德教授與
兄升元涵元俱有時譽江陵人謂之李氏三元湖北通志
檢存稿

毛鳳儀江陵人康熙中任甯羌州同遷肅州通判大兵征澤旺鳳
儀督糧至軍越兩狼山度戈壁瀚海至戈都先眾七日到墾王子
莊荒地六百二十里築威魯堡安置歸化回民勞勩卓著荆州府志

王士温字厚菴江陵人康熙庚辰武進士授侍衛時征噶爾丹以
功擢涼州鎮遊擊調任甯羌四川打箭爐土番滋事掠漢民五百
餘口士温率兵討之軍至被圍四十餘日絕糧十七日食馬革箭

囊殆盡番亦氣沮解圍去還所掠漢民平定番民爭界案而還尋
遷嚴州協副將告歸江陵志

鄭若璜字鬢川江陵人嘉慶丁丑進士以母老除官不就服闋授

志百四十

人物十八 列傳

齒

桑植知縣縣故無城若璜創修之歷署保靖沅陵清理積案所至
獄訟一空視吏民如家人父子時稱為鄭母年老乞歸後十餘年
土賊竊發桑植民恃城為固僉服若璜能遠慮云荆州府志

嚴先佑字爾康江陵人少孤事母以孝聞咸豐四年賊陷監利江
陵大震先佑時為團總傾資助餉率練勇隨官兵復監利城積功
投連州知州禁游惰察奸民勸墾種置學田久之四民安業後知

惠州肇慶二府皆有善政荆州府志

戴洪禧字福田江陵人同治癸酉舉人投龍泉知縣邑有官溝漑
田百餘頃歲久淤塞洪禧督役浚之以地少山多穀米不敷勸民
種麥以資接濟庚子之變鄰縣江山土匪滋事洪禧親率民團把
守要隘歷十晝夜不懈匪知有備不敢入境次年辛丑山水暴發
傷損人畜漂沒房屋頗多西南兩鄉尤重洪禧倡賑平糶民無失

所采訪

額勒精額字瑞亭滿州人荊州駐防嘉慶初以驍騎校從征苗教各匪轉戰數省有功擢協領在軍時領餉銀五萬例得羨餘數百金不以入己爲同行死事者治檟函其骨歸晉京口副都統遷松江提督以母老仍回京口任凡十二年治軍寬嚴並濟嘗置洲田數千畝歲獲租數千金士賴以飽立射圃義學俾防中子弟有肄業所後登鄉舉者接踵僉以爲善政所致以老乞休卒年八十六

荊州駐防志

魁玉字時若額勒精額次子由廕生歷擢涼州副都統咸豐初會同侍郎曾國藩提督塔齊布截勦上竄賊匪經將軍官文奏留湖北辦理軍務歷復武昌沔陽漢陽漢川黃州蘄州廣濟黃梅麻城螺山新隄洪湖沌口大小軍山等處當克沔陽時腰與左骹受重

志百四十

人物十八 列傳

五

傷得長子札爾哈蘇左右護持振臂再戰遂大克捷五年荊州戒嚴命署荊州右翼副都統堵勦襄河一帶賊五月調江甯副都統在金陵小水關攻勦四載餘身經數百戰嗣守丹陽與賊戰被圍刃相接傷右眉深寸許血溢盈斗時四子墨德哩隨征突圍入見父撲地口吮瘡血割袍裹之扶上馬仍前手刃數賊翼之而還八年署江寧將軍十一年幫辦鎮江軍務同治三年克復丹陽六月克復金陵十二月調京口副都統四年授江甯將軍九年署兩江總督十年調成都將軍成都事繁劇夷務民教多棘手悉心籌畫措置得宜駐防丁多額少奏添養育兵百名從之光緒三年舊傷發乞病歸出千金以助里黨困乏興書院助鄰賑凡善舉皆樂爲之性喜吟詠有翠筠館詩卒年八十諡果肅札爾哈蘇字壽林後歷四會惠來知縣有政聲墨德哩字瀛洲以軍功官至參領

荊州駐防

志

札克丹字仁山魁玉次子出後伯父魁德弱冠從征湖北江南兩省積功薦保知府同治三年授常州府亂後荒榛滿目飢民嗷嗷待哺乃請以工代賑設南北兩粥廠以食之其中者予以農器使就開墾半年墾田至十餘萬畝是歲大熟數年田畝益廣戶口來復百廢俱興十年以母憂歸起補河間府自淳沱改道郡內多水患疏請蠲緩民困少甦既而連歲大旱請帑賑之不足捐俸助之又不足乃乞於常州募得十餘萬金由此散粟平糶全活甚眾州

駐防志

文玉字崑圃滿洲人荊州駐防道光己亥舉人任遂平知縣時擒匪犯境文玉籌餉練兵召募鄉團多方守禦危城獲安荊州駐防志

元慶字雲章滿洲人荊州駐防補筆帖式咸豐初從將軍台湧勦

志百四十

人物十八 列傳

三

賊敘功授修仁知縣歷署懷集臨桂所至以廉能名八年土匪陳金剛據懷集叛元慶奉檄勦撫踰月克其城尋髮賊自閩入粵與金剛合復圍懷集文玉率眾登陴且戰且守四閱月城卒以全州

駐防志

額哲克字惟初滿洲人荊州駐防咸豐癸丑繙譯進士授工部主事歷員外郎擢韶州知府民俗多停柩不葬者額哲克捐助其費數月停柩一空浚溝渠育遺嬰郡政釐然荊州駐防志

恩夔字和亭蒙古人荊州駐防由筆帖式薦擢青州副都統初粵逆窺伺荆襄恩夔規畫方略悉中機宜將軍官文薦其才可大用及至青州南西二捻麇集山東而臨淄各縣賊尤出沒無常恩夔督兵攻勦出奇制勝斬馘甚多時青德諸營欠餉二十餘萬月糧復改折色軍將譟恩夔曲意拊循據情人告得旨寬為籌撥軍心

遂安荆州駐防志

恩澤字雨三蒙古鑲藍旗人荆州駐防由筆帖式歷遷佐領同治末從都統金順軍新疆攻下六城屯田牧地積功記名副都統署巴里坤領隊大臣移烏魯木齊金順薦其才可大用授吉林副都統時倭韓始構邊界繹騷恩澤保衛有方尋移瑋春圖們江墾戶數萬並韓人悉令土斷隸籍建四堡三十九社居之熟田升科萬五千餘垧甲午之役恩澤請於將軍由溫貴出師元山擾倭糧運輕兵三日可至不見用改署吉林將軍調補黑龍江將軍內輯教徒外遏馬賊俄人修北綫鐵路采木五城朝議聽其入山恩澤請立公司購運市價廉平俄人悅服清史館傳

毛壽登字恭則公安人明御史羽健子壽登仕明為工部主事康熙二年督撫交章薦之授天津道副使矜慎庶獄嘗釋入海捕魚

志百四十

人物十八 列傳

毛

者七十餘戶死罪畿輔歲饑請帑賑恤民無菜色荆州府志

龍之繩字孝公公安人順治戊子舉人康熙初授新會知縣時再定邊界民疲轉徙之繩力為撫恤絕饋遺革耗費與民休息有構訟者以理開譬往往懷牒去在官三月以疾致仕百姓送之有泣

下者康熙湖廣通志

高正儀字又生公安人事親以孝聞順治戊戌進士授南陽府推官廉明剛斷倡修學宮調天津推官歲旱禱雨有應改廣寧知縣撫綏流亡農民復業湖廣通志

鄒養赤字幼心公安人順治戊戌進士授壽光知縣下車訪民間疾苦一為逃人一為鹽政凡逃案發覺必加調護不以累及民鹽課不敷則捐俸代償期年漸臻富庶輿論大興公安志

鄒敬謨字贊后公安人乾隆丁巳明通榜進士府志選舉表不載授雲南

鹽課大使署騰越州事分里役編保甲頒教條治具周詳蠻民楊節得等聚眾開墾以爭鬪釀大獄敬謨奉檄往諭剖析曲直不戮一人羣蠻帖服荆州府志

羅宏漳字中峯公安人乾隆庚辰舉人任湘潭知縣有彭氏奴傲其主幼弱冒捐官職訴於學使學使袒庇之宏漳廉得其實論奴如律捐建昭潭書院置田為膏火資潭士益勉於學歷遷永順長沙知府調楚雄再調澂江調劑銅鉛廠費清剔鹽驛積弊有賢守

聲公安志

鄭其儲字又梁石首人康熙壬辰進士授檢討雍正初改戶部郎中廉幹有聲遷工科給事中出為松茂道修松潘城自黃勝關以西皆請設塘汎以資防守綿州奸民以旱聚眾劫奪勢洶洶其儲奉檄往捕乃先令各屬借給貧民倉穀散其徒黨及至賊首皆就

志百四十

人物十八 列傳

天

縛乾隆初授太常寺少卿轉大理寺晉左副都御史左遷順天府丞復補太常少卿告歸其儲莅官清勤職事修舉當時多之荆州府志鄭其攸字融齋石首人雍正己酉拔貢以知縣發山東監鄒平長山賑截留漕糧未到其攸請借青州軍餉賑十日而漕運至兩得無乏鞠滋陽殺人獄釋株連五十餘人補授諸城民馮興與其伯母比鄰利其財夜劫之縛置爐上以斃偽自縛其妻子若盜自外來者其攸疑之入興家見臥炕下有新泥掘之所劫物悉在因論

興如律石首志

熊開楚字文友石首人康熙己未進士授江都知縣時田賦改析不一吏役因緣為奸開楚別立田單盡除積弊增修城堞督造戰艦事集而民不擾鄰邑疑獄多委平決署高郵儀徵俱有聲以蘆課逋欠被議尋起知直隸新安縣人尚以熊江都呼之卒官貧甚

喪不能歸聖祖有居官清正之褒諭令巡撫李光地遣人護送之

歸本籍

石首志

案當次鄭其儲

李宗瀚字西林石首人增貢授融縣知縣邑境猺獞雜處動相讎殺宗瀚撫馭有方苗民咸格母憂起補德安兼理南康九江二衛事德安故有兵米每徵收升合奇零民以為苦宗瀚改徵折色其弊遂除建社學義塾常平倉禁站夫充昌築三卡以扼鄱陽湖嚴稽保甲盜賊以靖在任九年以外艱歸子文楷字硯章由中書官青州府同知復補臨安府同知阿迷州境民田為江水溢沒數萬畝文楷督工疏通之後遷澤州知府

江西通志石首志

李文琰字玉重石首人援例任大同府同知時滿漢爭田數年不決文琰按畝清查兩造均服擢慶遠知府民猺雜處號難治文琰捐俸建慶陽書院豐其廩餼土習一變歲饑亟發倉粟賑之莅任

志百四十

人物十八 列傳

无

六載撫輯得宜

石首志

張銘謙字劍潭石首人道光壬辰進士授刑部主事歷員外郎中遷福建道御史伉直敢言疏請任向榮以湖北軍務復陳隄工積弊並請汰石首縣丞以隄務專責縣令皆允行

荆州府志

龔榮遇字素若監利人順治壬辰進士授府谷知縣招流亡寬徭役修學宮城垣解署政績卓著遷行人歷刑部郎中預修大清律例出為平涼知府教條清簡遷西甯僉事改固原副使子啟正字恕孖由貢生官四會知縣亦有治行

荆州府志

易言翼字十菴監利人順治中由貢生任永甯知州隴苗謀變闖境震動言翼聚民入城堅守卒以無事在官數年百廢俱興擢大理寺丞遷工部郎中出權粵東鈔關革除苛斂商民便之改刑部郎中卒

監利志

聶士貞字元次監利人順治辛丑進士授定遠知縣時以逋賦株繫甚多士貞盡釋之令以限完納及詳請豁免逋戶感德輸倍早期年流民歸業田畝墾闢因崇學校獎節義優者老卹莞獨事簡民安毋憂歸起補鎮海知縣康熙十四年海寇犯城士貞率兵民搏戰殺賊數百賊始退卓異召爲內閣中書不赴

江南通志
荊州府志

周士元字善良監利人有勇略康熙十三年吳三桂反雲南士元從總督蔡毓榮軍攻辰龍關血戰先登以功授雲南督標守備歷遷嚴州副將郡中水性湍惡士元具舟募人拯救漂溺全活甚眾擢福甯鎮總兵平巨盜高松香設沿途巡緝弁勇譏察非常聞東以安調鎮南澳計擒海賊陳君元等卒官賜祭葬子彬字文若康熙壬辰進士授檢討出爲東川知府調夔州府丁未楚中大饑流民入川就食日以千計彬捐俸設廠給食置茅屋數十間爲之棲

志百四十

人物十八 列傳

三

止有死者給棺掩埋又請放關十日俾商人運米赴楚以甦饑民遷松茂道調平慶涇道乞養歸

荊州府志

楊志道字聖階監利人諸生援例授石城知縣摘伏發隱吏不敢爲奸焚毀淫祠贛州故食廣東鹽道遠價昂又逆流七百里至石城輓運維艱民多淡食志道知閩汀捷徑可通詳請招商設埠自此贛屬十餘城俱有贏鹽調知豐城邑當章貢吉袁諸水之衝隄旋築旋圯志道探水知下多泉穴椿木不固請帑數萬金用石炭塞穴而覆甕其上加土石築之工遂成再調鄱陽值歲大饑因修縣城以工代賑又勸富室出粟米價爲平升南康府同知他縣有疑獄上官多委令平之南豐民賽神結會知縣以聚眾聞志道力言其枉事得釋歷遷處州金華知府皆有治績

湖北通志
檢存稿

楊自欽字少儀監利人康熙戊戌進士授曹州知州懲蠹弊除陋

規遠近稱神明州糧向在張秋完納距州三百里自欽令在城完納官爲運送民便之州界桃園集錯隸七州縣境盜賊竄匿自欽

請悉歸管轄移州同知駐之境内以安

荆州府志

龔經遠字靜巖監利人嘉慶丁卯舉人以知縣發山東歷署肥城武城新泰壽張補海豐調荷澤荷澤盜魁趙甲董乙李丙等久弋未獲經遠至悉捕治如法境内遂無盜未幾巡撫檄捕教首三十餘人經遠察之皆良民走訴諸按察使逮至訊問得釋巡撫慊之

乞病歸子紹仁見文苑

王柏心撰誌

余庚陽字葵階監利人道光戊戌進士授三原知縣歷署韓城安塞甘泉富平等縣安塞縣治倚山蛟水暴漲城幾潰庚陽禱於神是夜風雨大作河西徙得無患甘泉有盜數十人僞爲句者庚陽詢知之擒置於法在三原最久同治元年賊眾數千來犯撲縣城

志百四十

人物十八 列傳

三

庚陽出健卒八十人迎擊之賊退圍立解遠近避亂者爭來附之

庚陽親歷巡視加以拊循時有余翁之稱擢乾州直隸州

荆州府志

胡大任字蓮舫監利人道光戊戌進士授禮部主事咸豐二年回籍幫辦團練從官軍敗賊於黃安俘斬千人分防德安武靖平勝黃土三關會勦河南賊戰信陽大破之五年漢口設捐輸轉運造辦等局皆以大任主其事接濟糧械未嘗匱乏曾文正官文恭胡文忠屢疏薦之積前後功遷員外郎以四品京堂升用同治二年兩廣總督毛鴻賓奏調赴粵辦理釐捐歲集數百萬而商民不病五年授內閣侍讀學士六年署山西布政使尋授河南按察使仍留署任七年真除八年以事罷歸

采訪冊

彭承堯字則之松滋人乾隆庚辰武進士授侍衛出補四川督標都司三十六年從征金川攻克山梁礪寨遷貴州前營遊擊累擢

四川提督從嘉勇公福康安至西藏平定廓爾喀圖像紫光閣列後十五功臣中調廣西提督嘉慶二年貴州狝苗仙遠仙姑煽亂廣西泗城猺羅龍登連應之以亞稿爲窟穴八渡附近諸山梁爲門戶承堯隨總督吉慶與勒保合兵勦捕承堯引兵陽由八渡攻其前別由小路躡山後直抵亞稿盡奪險要縛登連檻送之乘勝渡紅水江敗賊於板蚌賊竄新會又敗之時勒保已攻克洞泗賊勢益孤遂入冊亨州城盡討平之論功加太子少保賞雙眼花翎師還行至百色卒子朝龍乾隆乙未一甲二名武進士官汀州鎮標游擊坐事戍烏魯木齊令赴承堯軍効力以攻克那地小河功復原官後承堯五日卒於潞城兄子先龍乾隆丙戌一甲一名武進士官至參將

清史館傳
嘉慶志

謝元淮字默卿松滋人道光中任無錫知縣遷淮南監掣同知再

志百四十

人物十八 列傳

三

署海州通判時兩淮鹽法疲敝創行票鹽元淮贊其議收課羨銀四千餘萬湖廣民困於鹽每綱額銷十七萬引引四百斤直錢百新鹽引六百斤運岸減半歲省楚民食鹽錢千四百萬貫惜僅行一年遽止咸豐初擢廣西鹽法道以疾未赴卒

荆州府志

黃士瀛字仙嶠松滋人道光癸未進士授編修出爲昭通知府墾負郭曠地數十里引龍洞開水灌之盡成腴田民獲其利復課蠶桑禁溺女一郡大治調雲南府遷迤南道汰鹽井陋規六萬金課倍於前內艱起補敘瀘資道丁父憂遂不復出年八十一卒

荆州府志

熊文瀾字春帆松滋人道光丁酉優貢以知縣發陝西歷署甘泉咸陽安康知縣皆有惠政咸豐初粵匪肆擾楚境安康震恐文瀾先事設防民獲安堵七年邑大饑奸民藉災煽亂文瀾擒治之發倉以賑患乃息次年復蝗文瀾躬督農民步行烈日中竭力搜捕

購買蝻種俾無遺孽民咸德之

荆州府志

王懋勳字弼臣松滋人供事議敘從九品發安徽軍功薦保知縣
歷任壽合肥穎上等州縣四署亳州再署泗州直隸州擢六安直
隸州均有政聲同治六年初至亳時捻匪餘孽未淨查戶口平寨
勸農墾一方宴然光緒五年在泗州治盜有方結積案百餘起
三十二年再至水災歲歉請帑募捐散賑貧民存活無算

采訪冊

張志紱字子佩枝江人道光戊子舉人由鶴峰學正陞知縣發貴
州初署銅仁再署定番州桐梓民楊隆喜爲亂連陷邕邑距州數
十里志紱率鄉勇禦之擒逆黨百餘人賊竄去湄潭民以徵漕致
變檄志紱往撫民遂定因留知縣事三年投貞豐知州

荆州府志

楊利川字東之枝江人道光己酉拔貢同治初以軍功授銅梁知
縣邑山多田少會山水暴發被災民約萬餘人利川發常社各倉

志百四十

人物十八 列傳

三

平糶又請帑三千兩以賑令富商捐資買米接濟民免流亡建流
月門外石橋以利行人燬灘石以便舟設育嬰堂清節堂善政備
舉

荆州府志

張盛藻字春陔枝江人道光丁酉拔貢由刑部小京官累遷郎中
轉監察御史歷山東京畿各道擢戶科給事中改吏科同治
初開同文館擬選閣部翰林院六七品官入館肄業盛藻疏言天
文算學宜令欽天監算學天文生研究製造工作宜責成工部考
校不宜輟文儒政事之選誦法外夷議遂止光緒二年授温州知
府瀕海多盜盛藻勵精求治在任六年屬境晏然旋引疾徧遊浙
東名山水始歸築倦圃以居優游林下幾二十年年七十八卒著
有笠杖集雁蕩紀遊詩倦圃石記

采訪冊

胡樹槐字植三宜都人乾隆四十九年任衡陽知縣歲大旱百禱

無應山民告以某洞十里內有龍潭引其水則得雨然險絕無敢入者樹槐獨權小舟入洞度至潭乃以繩繫金鐵垂下四十餘丈聲若巨霆潭水怒湧樹槐墮水小舟流出民號泣謂官已死須臾樹槐浮出若有物負之者大雨立至四野霑足民歌曰胡公清暮夜卻金懷若冰舍死救民心潔精胡公慎事無小大天理順不測之淵敢輕進胡公仁龍負出洞雷霆奔起我民瘼澤如春

宜都志

王永禛字山如夷陵人崇禎己卯舉人順治中授靖江知縣守正奉公理繁治劇以廉能著稱

宜昌府志

左其選夷陵人康熙三年知建始縣值城郭荒蕪其選攜一僕至縣偕典史親刈荆棘結茅以居綏輯流民數百人給牛種俾盡力畎畝民以樂業

一統志

王恩進夷陵人祖三俊夷陵右營遊擊康熙初滇藩叛有持偽劄

志百四十

人物十八 列傳

三

誘三俊者三俊密擒之請援於荆卒保危城加都督僉事卒子孫遂家焉恩進雍正中拔貢授廬陵知縣持躬廉潔視民如家人父子情無不達母故賢恩進奉事孝事無鉅細必告母色霽則喜否則長跪請教一日鞭吏以十數退見母有慙色母問之具以吏胥舞弊對母曰汝性素慈不肯用刑能懲姦蠹民自鮮冤何愧之有

宜昌府志
江西通志

王言惠字思贊永禛從孫康熙癸巳進士授陽穀知縣甫下車廉

知豪猾吏二人痛懲之盡革諸陋規一邑稱治

宜昌府志

何毓秀字鍾岳夷陵人康熙癸巳武進士授侍衛出爲江西都司駐瑞州訓練有法盜戢民安

宜昌府志

張繼辛字椿亭東湖人乾隆庚辰舉人以知縣發湖南補甯鄉縣調武陵署瀏陽及桂陽州擢永綏同知遷都勻知府歷署貴陽思

南二府及糧道遷貴東道員憂歸服闋以道員發江南上南巡大府檄令隨行在所訊理控案尋從兩江總督某赴江西查辦就署江西布政使仍授貴州貴西道歷署按察使及布政使遷四川按察使留黔臬署任未赴卒繼辛爲政依於惠利而才敏過人上下咸恃之緬甸及苗疆用兵主饋給供張所在治辦軍興不乏人亦不擾

宜昌府志

傅治字暄亭東湖人乾隆己酉拔貢嘉慶元年教匪起邑境治慷慨出家資募鄉勇助官軍攻守駐長陽黑灣與柳坪賊戰勝之殲其渠殺數十人又守邑之界嶺赤土壩紅巖子當陽之雙店宜都之深冲口勦黃柏山朱履寨竄賊皆有功事平口不言勞時又有王德綏者以武生傾資募勇從官軍馳勦當陽宜都巴東歸州長陽等處賊穴小數十戰功多授千總

東湖志

志百四十

人物十八 列傳

五

吳秉綸字文綬東湖人嘉慶丁卯舉人以知縣發福建調赴臺灣署南路理番同知秉綸初渡臺探知臺東有地曰奇來山深嶺複最爲盜藪乃請率兵千人浮海直詣其地梯巖斬木搗其巢生擒劇賊數人餘盡俘以伏法盜以此靖後補泉州蚶江通判以母老告歸

宜昌府志

王德授字汝衡東湖人道光乙酉拔貢歷署德化屏南武平知縣廉潔自矢所至問民疾苦勤加撫字吏民皆畏而愛之卒於武平

武平人爲釀金立祠

宜昌府志

顧嘉蘅字香波東湖人道光庚子進士授編修擢南陽知府值髮捻之亂土寇蜂起嘉蘅修城浚隍大爲戰守之備一方恃以無恐歲飢開倉賑粟全活甚眾在任凡滿五考人稱其循績比之召杜

云

采訪冊

李東宣歸州人武生入營由外委拔補把總乾隆六十年從勦黔楚苗匪進攻滾牛坡枯樹坪鴨保砦等處皆克之功多嘉慶元年川陝楚教匪起內大臣額勒登保督師赴勦東宣隸焉攻黃柏山大壠口大小十餘戰積功升千總二年克馬湖營斃賊目張訓隴升襄陽守備四年勦賊開縣東境尋隨額勒登保攻川匪羅其清於箕山獲其清弟其書及子泳福斃賊目冉文儔分勦冷天祿股匪斃賊首張長庚升貴州清江都司五年正月擢川北遊擊四月陝匪楊開甲自山陽竄雒南復折向龍駒寨將窺河南東宣隨提督楊遇春率兵三千由西而南扼其去路賊方圍輝峪川民寨官兵至四面感之大敗其眾斬開甲子楊康賊目楊廣元及餘賊六百調荆門遊擊股匪伍金柱竄洞木溝分據山梁東宣領兵鈔擊復敗之擒斬七百餘級六年二月王廷詔高二馬五各股匪竄匿

川陝邊界老林東宣分路搜捕擒廷詔高馬二匪竄入寧沔楊家巖楊遇春令東宣設伏二郎壩山後龍洞溝賊至夾擊之擒高二馬五餘黨就殲累賞花翎沙噶巴圖魯股匪冉學勝竄入竹谿界聚高唐嶺劉家河一帶東宣趨河溝斬獲三百餘級賊由楚境回竄白河東宣取道五尺溝鈔出楊柏坡設伏迎擊所殺過當六月學勝竄灤河青號賊徐天壽餘匪與之合官軍追及於藍家山賊總崖而下踰界嶺將入川東宣徒步率兵仗追勦地險阻不可行士卒皆以槍矛接遞猱引而進及之黃墩擒斬二百餘級又敗之四季河十二月王山餘匪竄入固軍壩一帶東宣偕副將張瑗冒雪圍攻擒賊目苟文富桂其瞻等七年正月督兵駐通巴勦辦各股零匪四月賊踞小王澗東宣夜襲其營斬偽先鋒苟文清餘黨由平安寨大茨溝折竄秦嶺東宣先於平安寨設伏賊至乘夜襲

之斬獲無算五月股匪苟文明竄傅家河磨子溝東宣偕張瑗由秋水庵碾道迎擊文明竄走孝義額勒登保令東宣領兵追勦而自督大兵繼其後旋以賊竄入竹谿竹山令東宣由興安平利至二竹勦捕九月敗賊於陝境金河偏頭山賊西向平定河遁復追敗之觀音寨尖山嶺時三省邊界餘匪尙未淨盡東宣等分路嚴搜自八年至九年擒斬凡數百人十年湖廣總督吳熊光以東宣久歷戎行勞績最著薦保十二年調鄖陽遊擊二十三年升直隸固關參將道光二年升河間副將尋擢大名鎮總兵五年以疾乞歸十年卒

清史館傳

李元祥字資萬長陽人康熙中拔貢授懷甯知縣歷官九載德威並著士民咸稱其能

宜昌府志

彭淑字谷修長陽人乾隆庚寅舉人以知縣發江西歷署瑞昌七

志百四十

人物十八 列傳

三

陽崇仁瑞金等縣赴瑞金任時途次卽擒治惡少年數十人一日判一百八十餘贖皆竟補吉水知縣調臨川以法治黠吏黃河清等反爲所訐去官淑善詩古文辭著有秋潭詩集秋潭外集

宜昌府志

參憚敬墓誌

洪先燾鶴峰人乾隆戊申舉人任大埔知縣以勤廉稱士民愛戴調補三水署南海皆有政聲

宜昌府志

李定南字占離鶴峰人道光己亥舉人歷任靖邊清澗商南知縣清正得民奉檄赴滇襄辦軍務歷著勤勞雲貴總督張亮基特薦授漢中知府莅任未久川匪迭至連陷屬縣定南躬率將士登陴守禦踰兩月賊退以勞致疾卒陝撫以守城狀聞之朝贈太僕寺

宜昌府志

陳世凱字贊伯施州人

利川志云利川人一作恩施人

明末寇大擾世凱聚鄉人

殺賊殲其渠羣賊必欲得而甘心乃脫身走飢三日夜墮晉井中
匿得免初爲明桂王忠州副總兵順治十六年來降授副將銜康
熙十年從四川總督李國英征川東巫巴諸賊有功加總兵銜實
授杭州副將十三年耿精忠叛世凱赴金華援勦擊破其眾授溫
州鎮總兵尋復處州十四年復溫州十五年從下福建還鎮溫州
是時賊眾所在數萬東陽義烏之間尤甚金衢旣爲浙西門戶溫
處又屏翰金衢世凱料敵制勝於處則先奪桃花嶺於溫則先率
其子紀先攻破石塘皆二郡最要害處世凱勇敢善戰數以寡擊
眾身先士卒值攻城被數創不退卒拔其城軍中號曰陳鐵頭十
六年敘功加左都督世職二十二年復敘功晉世職二十三年擢
浙江提督請更舟山名詔爲定海又奏文廟丁祭武職一體行禮
議行二十八年卒諡襄敏世凱少賤此離及貴不置姬妾戢部曲

志百四十

人物十八 列傳

三

毋淫掠又從他將贖還被俘婦女釋之浙人感其德

施閩章撰陳提督事略序

史館傳
施南府志

陳天培字敬庵世凱次子襲騎都尉世職康熙三十二年授江西
撫標參將累擢蘇松水師總兵雍正初擢浙江提督十年調勇健
營總統駐甘州乾隆元年告歸陳紀者世凱養子膂力過人常從
世凱陷陣復義烏永康縉雲括蒼甌江諸邑石塘爲溫州險要賊
先據之我師三進三卻紀發三矢殪三人賊卻大呼先登賊棄險
走以功授游擊補寧村守備其地初復紀招徠流亡捐俸賑飢全
活無算累擢副將

施南府志
利川志

牟大寅字宏開施州人

一作利川人

從曾祖文綬明鳳泗總兵順治十

六年大寅與陳世凱同降平川東賊有功康熙十一年授浙江金
華副將十三年江西廣信玉山永豐叛兵土寇勾合閩賊犯常山

開化大寅擊破之斬偽將一人殲賊五百餘盡奪獲其器械十四年禦賊於湯溪敗之世凱號敢戰嘗深入賊壘大寅往援賊皆辟易軍中號曰牟老虎閩海平敘功累擢定海總兵左都督松江提

督利川志

張都字俞廷施州衛人康熙中由恩貢授定興縣丞以廉能遷高陵知縣緩刑愛民善俗造士有古循良風擢池州府同知年老乞歸家於鄧鍾祥志

黃開榜字殿臣恩施人行伍粵賊起從軍轉戰楚皖間咸豐五年賊據田家鎮從侍郎曾國藩提督塔齊布毀半壁山賊營歷升都司捻匪陷正陽關開榜率所部克之八年偕副都統穆騰阿敗賊於馬頭城九年會知府張曜破賊於三河尖復由蚌埠進攻懷遠斬馘無數賞勤勇巴圖魯授直隸督標游擊十年從侍郎袁甲三

志百四十

人物十八 列傳

三

進勦擒賊首張隆擢九江鎮總兵適苗沛霖勾合粵匪意圖東竄開榜合軍與楊岳斌彭玉麟諸將屢挫賊鋒苗逆伏誅金陵旋亦克復開榜回至九江卒諡剛愍清史館傳

饒應祺字子維恩施人同治壬戌舉人入陝甘總督左宗棠幕新疆建設行省贊畫爲多薦保知府光緒三年署同州府時秦晉旱荒赤地千里民因飢謀亂者眾應祺至日來固賑汝耳敢譁者誅乃諭富戶括糧入官稍昂其直予之又截留軍餉以濟其乏已而興水利勸種植居五年流亡盡復十年授甘州知府旋擢蘭州道調鎮迪道又調喀什喀爾道十九年陞新疆布政使俄人佔據阿爾泰山地爭還之勒石以定界二十一年關內河湟漢回交訌逆回乘機煽亂蔓延甘涼一帶其別股謀西竄出關關外叛回亦蠢動與相結署應祺新疆巡撫調集諸軍分路扼防進兵相勦連戰

皆捷匪首劉四伏就擒叛眾悉定予實授二十六年綬來回民馬
玉章復叛應祺先有備旬日事平二十八年調安徽巡撫行至哈
密病卒

清史館傳

李耀瑚字伯珊利川人少以善事親聞郡舉孝行力辭嘉慶己卯
進士以知縣發雲南署景東同知威惠並施民夷悅服值大疫施
藥活人無算移署安寧知州歲旱禱雨隨應補易門知縣興修水
利置書院膏火田有兄弟爭產親往論之訟者慙而止以銅課絀
罷貧不能歸子白躋由雲南籍成進士

利川志